

Wk. 519.

B. M.

II a
871

BREVIS ENARRATIO,

Condita

*A Serenissimo Potentissimoque
Rege Borussiae*

FRIDERICO I.


In Regia sua Berolinensi

SOCIETATIS SCIENTIARUM

Utq; ea tandem constituta sit & inaugurata.

Subjiciuntur Diploma foundationis, Leges institutionis, Oratio-
nes sub inaugurationem habitae & Catalogus membrorum
Societatis.

Observatorium Societatis Regium.



BEROLINI,

Impensis Joh. Christ. Papeonii, Bibliopolae Regii Societatisque
Scientiarum Regiae privilegiati.

Typis Gotthardi Schlechtigeri, Regii pariterque ejusdem Societatis Typographi.
M. D. CC. XII.





Brevis enarratio
Conditæ & constitutæ
Regiæ Prussiacæ Socie-
tatis Scientiarum.



Uemadmodum cetera in humanis rebus communiter haud feliciter succedunt, quam si conjuncta opera promoveantur, ita pariter in re Literaria seorsum observatum est, eam familiari societate plurimum qui in eundem communem scopum consensere, insigniter succrevisse. Initium laudabilis instituti superioribus temporibus ab Italis profectum est, quorum quas vocant *Academia* imprimis Florentina præter alias artes, id consecuta sunt, ut linguam patriam potissimum ornarent eique suavitatem haud mediocrem conciliarent. Eorum vestigia pari intentione patrum memoria Galli inivere, regnante rege Ludovico XIII. erecta sic dicta *Academia Gallica*, seu excolendæ linguæ Gallicæ Societate, neque minorem inde atque priores illi utilitatem collegere. Paulo post in Britannia delecta eruditorum cohors in societatem coivit sublimiore scopo, nimirum secreta Naturæ & arcana Mathematicarum

carum artium scrutandi studio, quæ procedente tempore Regalibus beneficiis ornata, nomine *Societatis Regiæ Anglicanæ*, per eximia Experimenta & Inventa orbi innotuit. Cui haud dispar institutum nobili regis sui amulatione, cum summo rei erudita emolumento Gallia in *Regali Scientiarum Academia* molita est, idemque iustis constantibusque legibus munitum consummavit. Sequuta proxime ibidem est *Academia rei Nummaria & Inscriptionum*, quæ universam fere humaniorem literaturam ambitu suo complectitur. Ceteras Architecturæ, Picturæ, Statuarie & aliarum similium artium academias jam omittimus,

Germania nostra, horum tentaminum haud otiosa spectatrix, tum per *Societatem Carphororum*, (quæ ipsam Gallicam Academiam tempore antevertit) linguam patriam, tum per *Leopoldinum Naturæ curiosorum Collegium* rerum naturalium & salutaris disciplinæ Medicæ scientiam erigere conata est, easque quantum fieri posset perficere adlaboravit. Nec inanis eorum, qui huc studium impendere, laudabilis labor fuit, publicatis passim operibus communi cum applausu conspicuus. Ceterum quæ in singulis illis seorsum proficua & excolendis nobilissimis pariter ac amoenissimis disciplinis opportuna conspiciuntur, ea conjunctim ceu in unum corpus contracta aut in compagem ingeniose redacta claudit a *Serenissimo Potentissimoque primo Prussorum Christiani nominis rege, FRIDERICO*, in ipsa præcipua sede regia Berolino, instituta *Societas Scientiarum*. Princeps hic, cujus animo ante quam regale solium ascenderet, regia consilia observabantur, tot memorabilibus bello paceque factis regnum suum super alia extulit, ut ea condigno splendore illustrata nostro venturisque seculis exponenda excellentioribus ingeniis merito relinquamus. Illa saltem addere hic strictimque memorare liceat, quæ ad incrementa eruditionis & artium potissimum respiciunt. Hic enim primo loco pro studiosis artium *Pictoriæ, Statuarie, Architectonicæ*, aliarumque huc pertinentium occurrit *Academia* earum culturæ in hac ipsa regia anno 1691. dicata. Porro pro instituenda nobili juventute tum in disciplinis ac artibus, tum exercitiis animi corporisque huic ordini maxime convenientibus *Illustri Academia* in eadem sede regia instituta anno 1705. Sed & eorum, qui ad altiores disciplinas contendunt, & ad rem publicam in ecclesia aut civitate capessendam adspirant, commodo prospectum est inde ab ipso exordio celeberrima *Fridericiana Universitas*

Ha-

Halensi, quæ sua initia Anno 1694. debet. Quibus singulæ hæc fundationes tum doctoribus & magistris pro diversitate scientiarum, artium, exercitiorumque eximiis, tum opimis redditibus, amplis ædificiis, ceterisque non ad necessitatem modo sed & ad ornatum & splendorem instructæ & abunde dotatæ sunt, Serenissimi conditoris providam curam & munificam liberalitatem, magnifice loquuntur, earumque irrefragabilia monumenta ad seram posteritatem perennabunt.

Non tamen hic substitit regalis providentia, verum iis quoque qui interioribus solidæ eruditionis, singulisque ejus partibus, sicubi deesse quid deprehendant supplere, si quæ rectius collocari aut ulterius promoveri possint, manum admovere idonei sunt, campum aperire voluit, in quo ingenuus eorum ardor in commoda rei eruditæ conjuncto studio utiliter decurrat. Hoc ipso fine anno 1700. regiam *Societatem Scientiarum* condidit, eaque opera publicum velut emporium sive forum convehendis artium scientiarumque thesauris; aut communem officinam conferendis ad earum amplificandas & ornandas operis instituit.

Primum rei consilium agitata tunc Calendarii mutatio suggestit, per eamque res calendariographica inter Evangelicos, in aliam plane formam reducta, cui juxta decretum comitale Ratisbonensè tuendæ, cum idoneis & in arte Astronomica apprime exercitatis viris opus esset, cogitationem injecit, annon Regiæ Majestati, cujus sceptræ tot intra & extra Imperium populi & provinciæ venerantur, merito conveniat, paternam regalis sollicitudinis curam huc quoque extendere, si quo modo eadem opera & propriis subditis & universæ rei Evangelicæ hæctenus prospici posset. Ea vero consultatio aliam porro genuit, qua ratione præsens occasio in medium vertat gravioris ponderis opus molendi, quodque circumscripta Calendarii impressione forte proventurum esset lucrum, constituendo collegio virorum qui una alias quoque scientias tractaturi essent, impendendi.

Vix ad *Regiam Majestatem* opportuno tempore delata res erat, cum per ingenium mentis lumen perspiceret, quantum inde sibi suoque regno gloriæ, quantum in subditos, & in universum omnes, maxime autem in rem publicam eruditam profectus & emolumenti esset rediturum. Placuit consilium, dataque statim mandata, ut diploma fundationis ipso auspiciato natali regio anni 1700. expediretur, emissio paulo ante in omnes provincias publico edicto Calendarii impressionem

nem moderante. Notabile imprimis, cum exemplo diplomatis fundationis expressa linguæ patriæ historiaeque mentio inserta initio non esset, id auscultanti prælectionem Regi observatum, sponte in mentem venisse, utque hoc cum ceteris præcipuum tractandorum caput diserte eo comprehenderetur constituisse. Idem deinceps in præceptis agendorum (*Instructionem* vocant) ampliore modo specialiter expressum, in legibus institutionis repetitum est.

Hac igitur ratione factum est, ut quibus patriæ aut exteræ Societates objectis singillatim occupantur, *S. R. Majestas* in sua *Societate Scientiarum* cuncta in unum compegerit, quod institutionis formulas jam allegatas, quarum potiores hic subjectæ cernuntur, lustranti facile apparebit, unum vero insuper adjecerit, idque supra cetera maximi momenti, cujus alibi nullum vestigium. Namque præter investigationem rerum ad Naturæ artisque Medicæ cognitionem pertinentium, nec non culturam & perfectionem Geometriæ, Astronomiæ, Mechanicæ, ceterarumque e Mathematicis fontibus derivatarum artium, cum Societatibus eruditæ Londinensi & Parisina, itemque Naturæ curiosorum Germaniæ communes; præter linguæ porro patriæ culturam, quod proprium opus Academia Gallica Italicaque, item Carpo-phorum in nostra Germania sibi sumere; linguarum præcipue Orientalium imo quicquid universo eruditionis artiumque ambitu comprehenditur, studium ad usum admodum religiosum suæque dignitate ceteros omnes longe antecedentem, designatam sibi metam agnoscit. Ne quando nostra regio inferior videatur his, qui pridem in Italia alibique nuper autem in Britannia, majore cognitionis lumine prælucente, propagandæ fidei labores suscipere, cum ipse genuinus finis & caput omnis eruditionis, Societati eruditæ subjectus conspiciatur, quæ res Evangelicos omnes bene sentientes ad consortium & adjutorium provocabit.

Proximum huic erat de capite dispicere, quod tantæ moli promovendæ, corporique quod tot tamque varia membra componeret, animando regendoque sufficeret. Id vero in persona illustris Gothofredi Wilhelmi Leibnitzii, S. R. M. Prussiæ nec non Serenissimi Electoris Brunsvico-Luneburgici Consilarii intimi sese obtulit. Hujus viri præter vastam rerum cognitionem, & probatam experientiam, profundum maturumque judicium & incomparabile ingenii acumen, quibus in regno literario famam venerationemque ad miraculum usque
merito

merito sibi conciliavit, hic etiam ut alias saepe de re communi optime mereri non cessavit, delatamque sibi summa dignatione provinciam pari voluntate suscepit. Namque post omnia fere inde ab initio se-cum communicata, quaedam etiam ab ipso suggesta, ut primum quid Regi statutum esset cognovit, Berolinum advenit, suisque salutaribus consiliis praesenti negotio constituendo & ordinando haud parum ad-jumenti contulit. Cujus etiam directioni ab illo tempore pari cum laude praest, quamquam quae alibi distinent occupationes nonnisi per intervalla praesenti adesse permittant.

Successit expertum exercitatumque Astronomum reperiendi cogitatio, cujus industria committeretur annua Calendaria condere, itemque observationes motuum siderorum instituire. Delectus cla-rissimus Gothofredus Kirchius est, vir in hac arte a multis retro annis celebris & experimento clarus. Is jubente Rege constituto opimo salario evocatus Gubena huc migravit, demandatamque sibi provin-ciam pro virili parte jugiter egregio studio ornavit, quod emissa in lucem publicam documenta luculenter comprobant. Neque tamen adeo felici esse licuit, ut inchoati negotii plenam perfectamque con-summationem attingeret, mense Julio proxime elapsi anni, Deo sic volente, e vivis sublatu.

Surgebat interea splendida substructio, in regione urbis quae Do-rotheopolis vocatur, sedes & receptaculum *Societati*, unaque contem-plandae caeli faciei commodum observatorium futura. Hae utut re-galibus impensis ad justam altitudinem sensim educeretur, serius ta-men quam pro destinatione perfici potuit, moram, praeter alios casus eo quod tum proxime exarsit, & adhuc dum flagrat, difficillimo bello, identidem injiciente. Ea vero mora singulare praeterea incommodum peperit, quod defectu convenientis loci stata colloquia & congressus sociorum institui non possent.

Neque tamen ideo praetermissum quicquam est, quod pro re nata persequendo negotio destinato faceret. Ergo virorum eruditione il-lustrum in Germania & extra eam, quibus profiteri nomina apud so-cietatem libuit, eximius numerus cooptatus est. Eorum nonnulli col-latis luculentis industriae speciminibus materiam suppeditavere colle-ctioni, quae tentaminis vice, sub titulo *Miscellaneorum Societatis Scien-tiarum ad incrementum Scientiarum* lucem novissime vidit, quaque, patefacto inde genuino Societatis proposito, ceu viam monstrabit & stimu-

stimulos addet his, quibus propria gloria commodisque publicis fer-
viendi animus & facultas non defunt.

Ipsa quoque *S. R. Majestatis* jugis beneficentia, præter alia in
Societatem collata, areâ simul ædificiis ejus usibus dicatis regio jussa
comparata auxit, inque eorum possessionem misit. Cetera complura
beneficia & privilegia consulto jam prætermittimus.

Perfecto tandem & suis usibus aptato, liberalibus sumptibus au-
gustissimi conditoris, supra memorato ædificio, cum nihil ultra desi-
derari videretur, nisi ut summa manu imposita consummaretur opus,
societasque in stadium præscriptorum pensorum ordine decurrendum
quasi mitteretur, placuit *S. R. Majestati*, non conditori modo, sed &
supremo Patrono, quod nomen Ipsa sibi summa voluntate sumsit, cum
solenni anniversario coronationis suæ hoc negotium proxime con-
jungere, ejus conficiendi cura Perillustri atque Excellentissimo Domi-
no *de Printzen*, Ministro & Consiliario status intimo, Præfecto pala-
tii, rerum Feudalium Directori & Consistorii Præsidi, utpote *Societati*
dato Protectori dignissimo commissa.

Ergo in antecessum quotquot hic loci degunt Societatis mem-
bra, congressi, in quatuor ex institutione classes, Physico - Medicam,
Mathematicam, Philologiæ Historiæque Germanicæ, universalis deniq;
præcipue vero Orientalis literaturæ & eruditionis, abivere. Hæ porro
singulæ juxta præscriptum Regium suum sibi Directorem seu Mode-
ratorem delegere. Primæ classis suffragia *D. Krug de Nida*, Regi a
secretis consiliis & Proto-Medico, secundæ *D. Chuno*, Consiliario &
Archivi Regii præfecto, tertiæ *D. Schott*, Consiliario & Bibliothecario
Regio, postremæ, *D. Jablonski*, S. T. D. & primo Concionatori Regio
cessere: ex eisque demum Pro-Præses designatus est. Tandem die
19. Januarii anni 1711, postridie anniversarii Regiæ inaugurationis,
post celebratum mane solenne equitum ordinis Regii aquilæ nigre
concilium, circa horam a meridie tertiam paulo ante nominatus Ex-
cellentissimus ad *Observatorium* se contulit, ab universo Membrorum
cætu, in descensu carpenti exceptus, & in supernum conclave, pro
tempore decenter ornatum gradibus deductus.

Medio conclavi mensa, post eamque sella locata erat. Ad eam
ubi adstitit Per-Illustris & Excell. D. Protector, concinna oratione
claves ædificiorum *Societati* dicatorum, itemque sigilla eidem ordina-
ta, in mensa ante se reposita, Propræsidi Societatis, quod ipse Præses,
D, de

D. de Leibnitz propter alia negotia praesens, adesse, prohiberetur, tradidit, eoque facto Societatem in possessionem eorum immisit, unaque praescripto operi adeundo solenniter admovit.

Excepit orationem Propraeses, pro tempore jam ante dictus D. Jablonski, cui ad dextram conclavis juxta parietem locus fuit, eumque continuo ordine membra *Societatis* hinc & hinc excipiebant, congrua responsione, qua finita, e cistula in ima mensa collocata depromptos numeros memoriales, Secretarius Societatis, primum Excell. D. Protectori, dein singulis ex ordine membris distribuit. Eorum imago in adversa parte caput Regis cum inscriptione solita, in aversa aquilam versus fidus aquila coelestis intenso volatu enitentem, quod idem sigillum *Societati* assignatum est, cum lemmate, *cognata ad sidera tendit*, & in exergo, *Societas Scientiarum Regia fundata Berolini optimi principis natali XLIV.* referebat. Additum & carmen eleganter & ingeniose a professore humaniorum literarum in Illustri Academia Regia, D. Neukirch, pro hac solennitate compositum, indeque D. Protector eodem quo receptus in accessu erat modo in discessu ad carpentum ductus est.

Ea tandem publica inauguratione, in spectabili frequentia eorum, quibus ei adesse lubuit, communi cum applausu peracta, id demum diuturnis votis exoptatum consecuta est *Societas*, ut cum forma congrua facultatem etiam nancisceretur iis operam navandi, quae scopo sibi praefixo & Augusti conditoris praescripto respondeant. Abhinc enim congressus & colloquia stato ordine frequentantur, unde volente DEO, fructus haud inamernos erudito orbi sperare licet.



FRIDERICI I.
Borufforum Regis
Diploma Foundationis,
Societatis Scientiarum
Berolinensis.



Nos Fridericus III. Dei gratia

Marchio Brandenburgicus, Sacri Romani Imperii Archi-Camerarius & Princeps Elector, in Prussia, Magdeburgi, Cliviæ, Juliæ & Montium, Stettini ac Pomeraniæ, Cassubiorum & Vandalorum, ac in Silesia Crosnæ Dux, Burgravius Norimbergensis, Princeps Halberstadii, Mindæ & Camini, Comes Hohenzollernus, Marca & Ravensbergi, Dominus Ravensteini, ut & terrarum Lauenburg & Bütow. Nostro, hæredum ac successorum Nostrorum, Marchionum & Electorum Brandenburgicorum nomine notum facimus Omnibus, quorum id scire interest & clementissime significamus. Nos, postquam DEO visum est in avitam Brandenburgici Imperii ac Regiminis possessionem Nos mittere, paternâ animi propensione, ac curâ ea Nobis amplectenda ac providenda esse statuisse, quæ, cum ad Electoralium cæterarumq; provinciarum Nostrarum salutem & commoda facerent, tum ad propagandam gloriam DEI, divinamque veritatem, ut & ad augendum virtutum bonarumque artium ac Scientiarum cultum eaque omnia quæ sciri publice interest, spectarent atque conducerent. Quod Consilium nostrum cum difficillimis temporibus non sine insigni fructu fuerit, ad illud restituta jam totius Europæ tranquillitate tanto felicius obtinendum, consultum arbitrari sumus instituire Illustrem Scientiarum Societatem, quæ nostris fundata auspiciis in iis quæ ad scopum ejus pertinent destinata nostra perficeret.

Quod itaque felix faustumque sit, provido consilio reque mature nobiscum deliberata, hanc nostram Societatem Scientiarum publicato hoc diplomate solenniter constituimus, instruendo eam idoneis hominibus, necessario apparatu, subsidiis etiam ac redditibus, adjecturi porrò quæcunque usus exiget ad finem tam eximiæ & laudabilis destinationis obtinendum. Patrocinium Societatis Tutelamque Ipsi suscipimus, audituri benigne &

impertituri clementissime quæcunque de rebus rationibusque ejusdem ad Nos relata ex usu & commodis ejus esse videbuntur, nec permisuri unquam ut quid ei accidat a propensa hac Nostra in eam voluntate alienum, aut ejus commodis ac consiliis ullum ulla in re impedimentum afferatur.

Ea vero nostræ Societatis Scientiarum præcipua & perpetua cura erit, ut admiranda divini Numinis & Naturæ opera, qua fieri potest industria, solertia ac judicio exploret, expendat ac scrutetur, quæque inde ingenium humanum vitæ utilia ad communes usus transtulit & certis argumentis comprobavit, aut transferre cum fructu potuisset, notet, describat exerceat & exercenda in publicum monstrat atque commendat: quæ nondum liquent ad certitudinem veritatis per experimenta perducere, quæ latent adhuc & occultantur, sagaci diligentia eruere, novisque inventis res humanas augere conetur.

Juxta hoc pari curâ ingeniosa quarumcunque artium opera ac inventa cum suis præceptis ac viis eò ducentibus, & si quid hætenus in thesauro humanæ cognitionis rarius aut sparsim obvenit, diligenter colligat, ordineque disponat. Ut adeo hujus nostræ Societatis scopus amplissimus sit & ad omnes illas disciplinas artesque, quæ ad utilitatem publicam, erundam veritatem, & acuendum ingenium maxime faciunt, sese extendat.

Quin & in eo operæ pretium collocavimus, ut cum ad asserendam genuinam linguæ patriæ castitatem copiam & elegantiam, ornandamque hac in parte Germanici nominis gloriam, tum ad illustrandam universam Historiam Germaniæ, præcipue vero res gestas nostræ Domus, & quæ in provinciis Nobis subiectis in sacris ac profanis memoratu digna evenerunt, literarum monumentis commendanda cogitationes suas ac studia conferat.

Providebitur etiam a nostra Societate Scientiarum ut in omnibus disciplinis liberalibus variis licet, cognatis tamen & affinis, atque a communi sapientiæ fonte manantibus, expedita justa ac firmissima ratio earum tradendarum & addiscendarum existat.

De-

Denique cum certum & in confesso fit, rectum de DEO divinisque mysteriis sensum ac verum Numinis cultum, omnesque adeo Christianas virtutes tam in ipso orbe Christiano, quam inter gentes nostrorum Sacrorum expertes, ea via quam Deus ipse edocuit, a nullo hominum genere rectius & melius in animos hominum insinuari, quam quos vitæ integritas juxta ac morum innocentia, rerum quoque divinarum ac humanarum interior cognitio commendant: ideo volumus atque Societati Nostræ id negotii damus, ut sub Nostris auspiciis sincerus Numinis cultus ad gentes longinquas & magnis terrarum intervallis disjunctas, quæ adhuc in tenebris summæ ignorantie versantur, transferatur & extendatur.

Constituimus porro clementissime ut hujus Nostræ Societatis stabilis ac fixa sedes sit in hac Nostra urbe principe, aulæ Nostræ regiminisque præcipua sede, in qua etiam Turrim speculatoriam, ad observanda sidera & cælorum motus, curamus ædificandam, instructam simul conclavibus idoneis tam ad conventus eruditi hujus Senatus habendos, tractandasque statis temporibus res ad hoc institutum pertinentes, tum asservandæ suppellectili literariæ & apparatus instrumentorum experimentisque chymicis aliisque instituendis.

Cum vero ad tam præclarum & late patens institutum, multi atque in diversis sæpe locis commorantes homines, suas operas conferre debeant, per Nos licet, ut nulla habitâ diversorum sacrorum ratione etiam exteri iique idonei & periti homines pro conditione cujusque certa ratione in istam Societatem cooptentur.

Subjectos autem nostros præsertim muneribus publicis fungentes, & nominatim omnes qui bonarum artium studiis addicti sunt, pro conditione cujusque efficacissimè monemus ac hortamur, ut si qua in re Societatem ejusque industriam, ad consequendum finem propositum pro bono publico, juvare valeant, id ut faciant, suaque candide impertiant. Erit id Nobis

gratisimum & securus quilibet gloriæ ac laudis, quam cuique tribuent pro meritis qui illustri huic Collegio præerunt.

Quod reliquum est, Nostram Scientiarum Societatem præterea exactiore & ad hoc institutum sigillatim accommodata voluntatis Nostræ declaratione quid pro re ac tempore opus sit edocere, certis legibus munire, omnibusque ad consilium tam honestum ac utile explicandum & feliciter exequendum pertinentibus commodis gratificationibus & privilegiis eandem vim ac pondus habituris, ac si huic Foundationis Diplomati insertæ existerent, ornare ac beare decrevimus.

Atque hæc est summa voluntatis Nostræ, cui parere omnes, uti par est, volumus. Ad corroborandam hujus diplomatis fidem ac autoritatem nomen illi Nostrum propria manu subscripsimus, & Sigillum Majus appendi jusimus. Datum Coloniae ad Suevum die XI. Julii Anno MD. CC.

Fridericus.



P. de Fuchs.

Novissima
ORDINATIO,
Regiæ Prussiæ
Societatis Scientiarum.

NOS FRIDERICUS, DEI gratia

Rex Prussiae, Marchio Brandenburgicus, S. R. I.
Archi-Camerarius & Elector, supremus princeps Arau-
sonis, Novi castri & Vallangini, Magdeburgi, Cliviae,
Juliaci, Montium, Stettini, Pomeraniae, Cassubiorum &
Vandalorum, Meckelburgi, item in Silesia Crofnæ Dux, Burggravius
Norimbergensis, Princeps Halberstadii, Mindæ, Camini, Vandaliæ,
Ratzeburgi & Mursiæ, Comes Hohen-Zollerae, Ruppini, Marcae, Ra-
vensbergæ, Hohnsteinii, Tecklenburgi, Lingæ, Schyverini, Buhrae &
Leerdami, Marchio Vehræ & Flissingæ, Dominus Ravensteinii, ter-
rarumque Rostochii, Stargardiæ, Lauenburgi, Butovia, Arlæ & Bredæ.
Quandoquidem Nostræ Societati Scientiarum hoc in loco instituta,
medium tabernaculum posticæ partis stabuli nostri Dorotheopolitani
pro Observatorio, unaque pro sede & domicilio designatum, nostris
sumptibus excitare usibusque suis commodum præstare gratiose susce-
pimus; Idque opus Deo adjuvante, hucusque jam confectum est, ut
in possessionem ejus usumque immitti, & conventus negotiis sibi im-
positis rite peragendis necessariis, impræpedite aggredi, ac statis die-
bus continuare possit; e re esse duximus, convenientis ordinis per-
petuique stabilimenti gratia, præter ea quæ in Diplomate foundationis
& Generali Instructione constituta sunt, sequentes leges præscribere,
iisque superiora in tantum declarare & ampliare.

Et ut ab ipso Præsidente initium faciamus, qua ratione ad præsens
constitutus est, in ea nihil mutandum duximus. Placuit autem præ-
terea, ex hoc tempore & in posterum perpetuo e Nostrò sanctiori sta-
tus Consilio, unum, ac pro tempore Nostrum Consiliarium status in-
timum, Palatii præfectum, Curia feudorum directorem & Consistorii
ecclesiastici Præsidentem, *de Printzen*, Nostræ Societati Scientiarum desi-
gnare, & constituere, cui negotia sua, si quæ ad Nos usque deferri ne-
cessitas postulaverit, commendet, quique post decessum præsentis Præ-
sidis Societatis, eam tanquam Præses honorarius solus moderetur, ejus
commodis invigilet, legumque & sancitorum à Nobis editorum ob-
servantiam tueatur. Ne tamen vel præsentis præsidis absentia, vel fu-
turi aliunde cumulatæ occupationes, agendis Societati præscriptis mo-
ram aut impedimentum qualecunque faciant, præsidium hoc e mem-
bris Societatis delectus Pro-Præses perpetuo sustinebit.

Quan-

Quandoquidem igitur uniuersa procuratio dirigendæ sustinendæque rei Societatis, quæque ad ejus tum conseruationem tum incrementa faciunt, ad hunc Vice-Presidem conjunctim cum concilio Societatis, rite pertinent, statuimus ut idem Concilium Directores singularum classium, una cum uno e Nostris advocatis fisci; a Nobis ex nominatione Concilii ad hoc constituendo, & Secretario Societatis, constanter componant, sicque compositum constituant.

Cumque porro accuratiori materiarum tractationi conducere arbitremur, si in certas classes secernantur, eas in quatuor sequentes discretas esse hisce iubemus. nimirum ut una Res Physicas, Medicas, Chymicas &c. altera Res Mathematicas, Astronomicas, Mechanicas; alia culturam sermonis Germanici una cum historia tum ecclesiastica tum civili Patria, præcipue antiqua; alia denique Literaturam imprimis Orientalem, eamque in propagationem Evangelii ad infideles utiliter vertendi rationes complectatur, hisque singulæ seorsum occupentur.

Harum classium uni ad minimum, singula Nostræ Societatis membra nomen dare, hucque studia sua conferre postulantes, porro fancimus, ut qui singulis classibus sese addixere, e medio sui Directorem eligant, pluralitate suffragiorum ab his qui hoc fine convocati adfuere, constituendum.

Ad Officium Directorum, quod quidem, si in loco degant, neque aliis negotiis ab actuali ejus administratione auocentur, ad vitam gerendum possidebunt, pertinebit; primo conventus classis suæ moderari, agendorumque & tractandorum propositorum decentem ordinem observare: porro, de quo jam actum, Concilium componere, in eoque intima Societatis curare: denique Vice-Presidis Societatis munere per vices in singulos annos defungi. Ordinis initium sequentemque successionem ex consensu ipsismet determinandi potestas esto, singulæque alternationum vices ad ipsum natalem Societatis, aut proxime subsequentem ordinariis conventibus assignatum diem solentur in præsentia omnium membrorum peraguntur.

Presidi honorario à Nobis designato ad Concilium accedendi, idemque si ex necessitate fuerit extra ordinem convocandi libera facultas erit: ad Vice-Presidem autem pro tempore gerentem pertinebit, concilium statis diebus habere, quo res Societatis qua decet diligentia curentur, quæque ad incrementa, conseruationem & ampli-

cationem ejus utilia aut necessaria judicabuntur, magno studio observentur, legibus normæque a nobis præscriptæ strictè insistatur, quæ; in damnum aut impedimentum cedere possent, commode avertantur.

Specialius ad curam Concilii pertinebit, Fundum Societatis, quæque huic constituendo ordinata sunt, aut posthac ordinabuntur, sollicitè conservare, & qua fieri potest, incrementis ejus prospicere, nobisque modos huc facientes, si qui forte occurrent, subinde indicare, quo magis pleniusque eo sufficienter aucto, intentioni Nostræ satisfiat, & ex eo quod a ceteris necessariis sumptibus superabit, in posterum paulatim in singulis classibus ac primum quidem in Mathesi & Physica delecti & Concilii testimonio ornati homines constituentur, qui convenienti salario provocati totum suum studium operamque huc impendant. Pariter Concilio curæ erit fideli & rectè ordinatæ fundi hujus administrationi, perceptorum & expensarum calculo rite digerendo, & rationibus in singulos annos dispungendis, sedulo prospicere: porro receptionem membrorum ita moderari, ut nonnisi doctrina & eruditione in aliquo genere præscriptarum classum insignes publicisque speciminibus celebres viri cooptentur, quive in futurum undecunque id fiat hoc sine commendabuntur, eorum commendationis, prævia cum classe cui se cooprandus potissimum addicturus videtur, communicatione, rationem habere, sicque demum Receptionis diplomata edere: præterea inferiores Societatis ministros, pro rei exigentia, constituere, singulosque ad præstanda decenter officia hortari: editionem Actorum Societatis quoties id fieri opus erit, procurare, cunctaque alia quæ in honorem, decus & incrementum Societatis, scopumque rite assequendum quovis modo faciunt, quam fieri potest optime providere. Cuncta vero hoc ordine tractare jubemus, ut quæ in deliberationem adducenda sunt, primum a Vice-Præside, deinceps etiam a ceteris, si quis quid monendum habeat, rite & ordine proponantur, suffragia virorum colligantur, conclusum secundum majora formetur, cuncta a Secretario excepta in tabulas referantur, ab eodemque porro, si quæ describenda literisque consignanda sunt, sine mora expendantur.

Fundum Societatis, præter salaria eorum quos rebus ejus administrandis hactenus necessario admovere oportuit, præcipue destinatum volumus, ut ex annuo residuo tum bibliotheca selecta, scopo & usui Societatis quam maxime accommodata, tum necessaria Instrumenta

menta Mathematica; tum conspicua copia curiositatum Naturæ ex omni regno, pariter & Artis, novorum scilicet inventorum, machinarum earumque modulorum, & si quæ alia rariora in Mechanicis occurrunt, adeoque thesaurus Naturæ & Artis congeratur: porro arcanis Naturæ perscrutandis Physica, Chymica & Anatomica, experientia sedulo adhibeantur, sicque reconditæ rerum virtutes penitus referentur. Providendum itaque erit, qua ratione tum supellectilis ejusmodi successively conquiratur, tum pro re nata utilia tentamina & experimenta, ita tamen, ut res proposita in classe cujus ad objectum refertur, ante probe examinata, Concilio etiam probetur, instituantur, simul qui in hujusmodi rebus efficiendis studium aut opem utilem contulere, condignis præmiis pro ratione & negotii gravitate ornentur, denique super his ceterisque Societatis destinatis perficiendis & promovendis cum exteris Societatis membris aliisque eruditis commercia literaria sollicitè stabiliantur. His igitur unice prædictum fundum provide & attente impendi volumus.

Haud minus colloquiis ordinariis membrorum hic loci præsentium instituendis certa dies in singulas hebdomades præfigenda est, qua qui singulis classibus nomina dedere, separatim & successively eo quem ipsi sibi consensu constituerint ordine, sicque singulæ classes semel in mense conveniant, suoque Directore moderante, de rebus suæ classis & ad eam pertinentibus Scientiis collationem instituant.

Quodsi in diem præstitutam sive festum sive quæcunque feriæ incidant, quæ conventum agi prohibeant, eum quidem mutari & in præcedentem aut subsequenter transferri placet. Quodsi vero ne id quidem commode fieri queat, ordinem tamen haud interrumpi, sed quod eo die habendum erat colloquium, in sequentem constitutum diem differri volumus.

Singularum classium conventus membris eas constituentibus Director per pedellum Societatis aut qui ejus vices implebit; generales omnium congressus Præsides aut Vice-Præsides pridie semper indicet.

Directoribus congruus tuendo officio locus integer maneat; ceteri sine præjudicio gradus quem alio respectu obtinent, incerto ordine locum occupabunt, in suffragiis ferendis a dextris Directoris initium facturi, ut suo quisque ordine verba facere norit.

Neque dubitamus fore, ut suum cuique studium & in literas propensio suggerat, quæ in augmenta Scientiarum meditanda sibi proponat.

nat. Si quæ igitur aut sibi meditata aut aliunde observata quis habeat, ea per singulos congressus singuli vel bini, eo quem ipsi sibi imponent ordine, seu voce in medium proponent, seu si id magis visum aut subjecti dignitas exigere videatur, scripto conceptum Directori tradent, post absolutam publicam prælectionem tabulis actorum adponendum.

Post absolutum hoc modo unius sermonem aut lectionem, licebit ceterorum membrorum unicuique supra memorato ordine de propositis sensus suos aperire, sive ad rem amplius illustrandam, sive ad dubium forte movendum tendant, quo posteriore casu ab ipso qui objectioni locum dedit, aut ab alio assidentium solutio expectabitur.

Proxime, nisi interdum ordinem mutari res ipsa postulet, epistola si quæ ad manus sunt, ab exteris membris perscriptæ, & primum quidem quæ ad totum collegium, dein quæ ad privatos diriguntur, & subjectum tractationis respiciunt, prælegi, de super sermones conferri, conclusum quod è re videbitur formari fas esto. Quæcumque vero acta & transacta, Secretarius Societatis, quem per officium cunctis Societatis conventibus interesse iubemus, (nisi vel morbo vel alia causa fontica distineatur, quem in casum, nemini extraneo, sed uni membrorum ejusdem conventus ad hoc exorato, vices suas demandare liceat poterit) in tabulas referet, quæque his consequenter scripto expedienda erunt, qua par est diligentia procurabit.

Denique, si tempus colloquio præstitutum ferat, qui suafu collegii auctorem dignitate aut novitate insignem legendum, aut scriptum censuræ & approbationi oblatum examinandum receperit, lectionis suæ rationem & observata exponet.

Ordinarios conventus præcipue quidem singulis classibus addicta membra studiose frequentabunt, neque quod speramus sine gravi causa iis abstinebunt: licitum tamen erit ceteris Societatis membris, ad conventus classium quibus ipsi nomina non dedere, libere accedere, extraneos autem & a Societate alienos admitti aut introduci, nisi Directore annuente, haud liceat.

Hæc

Hæc erit negotiorum Societatis tractandorum ratio, per decur-
rentes annos continuanda, nisi quod hebdomades Passionis, Paschatis,
Pentecostes, juxta consuetas messium ferias, unaque spatium a XXIV.
Decembris usque ad sequentem proxime VI. Januarii diem utrinque
inclusive pro legitimis vacationibus declaramus.

Quæcunque collati hoc modo studii sui & operæ documenta edi-
tura est & rerum testimoniis adprobatura siue universim Nostra Scien-
tiarum Societas, siue singillatim singularia ejus membra, ea Nobis quo-
vis tempore gratissima futura gratiose testamur, operamque daturos,
ut quam summa voluntate singulorum meritis congruam habemus re-
galem benevolentiam, benefaciendique & promovendi eos deside-
rium, agnoscant abunde cuncti & re ipsa experiantur. Quorum ut
plena constet fides hæcæ propriæ manus subscriptione, regalisque Si-
gilli appensione munitas dedimus Carolinæburgi die III. Jun. Anni
M D CC X.

Fridericus.



Comes de Wartenberg.

Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.



Faint, illegible text, likely bleed-through from the reverse side of the page.



ALLOQUIUM
Per-Illustris & Excellentissimi
DOMINI
MARQUARDI
LUDOVICI
à PRINTZEN,

S. R. M. Pruss. Ministri & Consi-
liarii Status intimi, Ordinis Prussici
Aquilæ nigrae Equitis, Præfeti Palatio, Consistorii
Præsidis, Rerum Feudalium Ecclesiasticarumque Dire-
ctoris, Regiarum Universitatum supremi Curatoris,
Capitanei Comitatus Ruppiniensis & territorii Belli-
nensis, Ecclesiæ Cathedralis Magdeburgicæ Canoni-
ci, Domini Hereditarii in Caro,
&c. &c. &c.

Pro Inauguratione
Societatis Scientiarum.

D

INter tot tantaq; & innumera pænè
monumenta singularis illius & verè paternæ in-
dulgentissimæque curæ, quam Augustus ac Potentissimus
Rex, Dominus noster longè Clementissimus, pro salute,
incolumitate, flore atque incremento omnium sub auspi-
catisimo sceptro suo Divinâ Gratiâ tam pulchrè adhuc stantium
Regionum, Provinciarum atque ditionum suscipere nunquam
defatigatur, & cujus veluti testes sunt sempiterni, tot condita
atque amplificata templa & divinis honoribus consecrata loca,
tot ad fingenda atque polienda surgentis juventutis ingenia vel
positæ vel emolumentis ornatae Universitates, Equestres cæteræq;
Scholæ, tot latæ saluberrimæ Leges atque Constitutiones, quin
superba illa tot locis non minùs ad commune bonum, quàm ad
maximum harum terrarum splendorem, non sine exterorum pe-
regrinantiumque summa admiratione, effusissimo sumtu constructa
ædificia, quæ omnia Augusti Regis nostri non intermorituram
memoriam posteritati commendabunt: Inter hæc ipsa, inquam,
tam immensa tamque stupenda paterni illius indulgentissimique
affectus rarissimæque pietatis jucundissima testimonia, quæ Opti-
mus Rex sibi subjectorum cordi habere salutem consuevit, illud
certè non infimo loco ponendum existimo, quòd, posteaquam
nuper, confecto superiori bello, alma pax oris nostris conciliata
fuit, Ipse omnes suas curas atque cogitationes, alioqui semper
etiam in salute populorum suorum exercitatas, tum eò potissi-
mùm converterit, quemadmodum annuente Summo Numine,
Ipse se Gloriosissimo Protectore ad colendas magis artes, latiusq;
circumscribendas pro communi bono disciplinas, & præcipuè ad
ornandam Divinam gloriam, disseminandamque salutiferæ veri-
tatis Christianæ Doctrinam, quædam pulcherrimarum scientia-
rum quasi Societas in his Regni domiciliis coiret atque aperire-
tur. Nimirum deesse ad consummationem laudis ac gloriæ suæ,
in illa Academiarum, Universitatum, Scholarum, ceu Musarum
ac

ac sapientiæ totidem ferè habitaculorum, quibus Regiæ ditio-
nes ac provinciæ jam abundè instructæ atque ornatae sunt, mul-
titudine, Sapientissimo Principi istiusmodi adhuc Academiae vi-
debatur fundatio, in qua tam exsplendescantium in Naturæ
regno operum admirandorum Dei contemplatione, quàm ob-
servatione, cultu, imò & inventione præstantissimarum quarumq;
rerum, literarum, artium, cæterarumque optimarum ac in laude
& virtute versantium exercitationum, tum Regni atque ditionum
suarum & communis Germanorum patriæ gloria magis magisque
ad illustrius sublimiusque decus exurgeret, & in perpetuis orna-
mentis floreque consisteret, tum etiam institutis ad hunc usum
non ad finitimos solum Christianos, sed & ultimos Barbaros,
commeatibus, disseminandæ Evangelicæ veritatis studium & fama
Servatoris nostri Jesu Christi eisdem gentibus pedetentim impor-
taretur. Cùm verò ad arbitrium postea Divini Numinis, & ex
æviterno ipsius sapientissimo consilio bellum denuò exarde-
ret, & latius etiam, quàm antea, vagaretur: Cùm, inquam, Au-
gusti Regis nostri provinciæ undequaque non armis tantum cir-
cumdaturæ essent, sed Ipse etiam, quòd eorum societatem vitare
non poterat, eisdem implicaretur, quibus præter spem & expe-
ctationem omnem etiamnum est involutus; in prosequendo ta-
men eximio hoc pulcherriimoque instituto usque adeò Ille non
retardari se passus est, ut non modò in tempore idoneis peritisq;
Viris seu membris, ornatisimo etiam fundo, apparatu, sumtu, cæ-
terisque ad æmulationem compositis largitionibus, hanc convo-
catam à Se societatem locupletaverit, sed etiam, quòd ad sublime
longeque perfectissimum decus ac gloriam illius pertinere pote-
rat, Ipse se summum Eiusdem Protectorem sit professus, imò etiam
hanc tam Augusto Ipsius præsidio sultam, prolixissima protec-
tione recreatam Sibi que tam caram Scientiarum Societatem, ho-
dierno die, qui à Sacro coronationis Ipsius festo secundus est, so-
lenni ceremoniâ aperiri, & quòd vocant, introduci, partibus his
mihi impostis, clementissimè jusserit. Non possumus itaque

gratiosissima hæc Clementissimi Regis nostri munera pari animi affectu, cultu, ac devotione assequi, vel laudibus etiam satis extollere ac celebrare : Et quemadmodum partes præcipuæ gratissimæ mentis officiosissimæque pietatis nostræ in eo fortasse propter tenuitatem nostram constituendæ & ponendæ sunt, ut de nutu & voluntate Sapientissimi nostrorum temporum Salomonis certiores facti, ad ea omnia summa animorum contentione perficienda omnem industriam nervosque omnes intendamus, quæ ad maturandum saluberrimum consilium Clementissimi Regis nostri pro virili, & ad institutam partitionis operarum formulam, effici vel maximè atque conferri ab unoquoque nostrum poterunt : Ita meritò etiam ardentissimas preces illas piaque vota, quæ omnes sceptro Borussico subiecti pro exoptatissima carissimaque Augusti Regis salute sine ulla animi remissione dies noctesque assiduè nuncupant, in eum profectò finem ore animoque geminare ac quasi coacervare nos oportebit, ut Deus Opt. Max. istud semel nobis cælitus donatum pretiosissimum pignus & sacrum duraturæ felicitatis nostræ palladium, in multos imò infinitos annos, in hoc Regno florentissimo, copiosissimâ omnium rerum ac deliciarum affluentia, fortunatissimo atque exoptatissimo Regio Statu, eâ benignitate, quam super alias virtutes præcipuâ sanctitate ac Nominis Divini honore meruit, quàm diutissimè conservet, & quicquid vel fingi vel optari ac voveri lætum faustumque Indulgentissimo Principi potest, id omne, etiam non precantibus nobis, Illi largiter concedat. Annuat benevolè atque aspiret Numen Cœleste uti omnibus providâ sapienteque ac piâ curâ susceptis ab Eo consiliis, ita in primis Illustri huic gloriosissimo exemplo conditæ Societati, ut illius ope atque adjumento, quæ mens atque ratio consilii Augusto Regi semper constiterat, Numinis sanctissimi Gloria in ultimas terras propagetur, Ecclesiæ Christi fines perangusti latiùs proferrantur, & in ipsis illis locis, ubi densâ caligine ac cœcis inscitiae atque infidelitatis tenebris omnia adhuc occupata & obsita jacuere,

cuere, signum fidei Christianae sustollatur, parique modo mortalium animi ad bonas artes scientiasque, clarioremque ac luculentiorum Divinorum operum notitiam atque laudem inflammentur, & cum fama atque celebritas omnium Augusti Regis nostri provinciarum atque Regionum, tum inclutum etiam Germaniae Illustreque nomen aeternis monumentis condecoretur. Ego verò etsi conscientiam virium mearum partim deterritus, partim aliorum mihi incumbentium gravissimorum negotiorum mole obrutus, huic Nobilissimae Societatis Praesidio ac curae omnino superfedere potuissem, ad quam ornandam vel parum certè vel nihil adjumenti proficisci unquam à me poterit; nihilo secius malui tamen hujusce cogitationis momenta non ponderare quam coeco illi ac humillimo obsequio, quo ad omnia Clementissimi Regis mei iussa atque arbitria, & ad hanc ad eò liberalissimam ejusdem voluntatem atque nutum me adjungo, vel in re minima deesse, hanc potissimum fiduciam fretus, fore, ut Vos, Praestantissimi Viri, qui in Regiam hanc atque inclutam Societatem allecti estis, quique omnes ferè ac singuli prolixè semper studii & amoris erga me Vestri planè singularis signa luculenta & notas manifestas extare voluistis, ita operam etiam Vestram mihi mutuam, & praesens hoc tempore auxilium, id quod enixè à Vobis peto, commodare ac impertiri non dedignemini, quò ad eò per singulare illud studium, impetum etiam, quo, ad juvanda nobilissimae hujus atque hodierno solenni die hac cerimonia ac inauguratione veluti renascentis Scientiarum Academiae commoda, naturae quodam impulsu feror, quodque studium nullo tempore deponam, ego fideli opera Vestra adjutus, ad aliquid praestandum idoneus reddar, qua in re industria etiam mea atque labor omnis semper versabitur. Quod ergo felix faustumque Deus Opt. Max. esse jubeat, Clementissimi Regis nostri jussu gratiosissimo, Tibi, plurimum Reverende ac Doctissime Pro Praeses, & per Te toti Nobilissimae Regiae Scientiarum Societati, tam concessum ab Ipso Augusto Rege Sigillum, quo, quando volueris, in

omni rerum atque negotiorum illius administratione uti quolibet tempore ac rite poteris, quam has claves etiam Observatorii, & illius Societati huic attributae areae, solenni ritu jam trado, atque ex Clementissima Supremi Protectoris & Augusti Regis nostri sententia ac voluntate huic Illustri Societati tum consecratum hoc Eidem domicilium addico, tum in jus atque ordinem coitionum & administrationum suarum inmitto, precatus ex animo, ut traditae hae claves, velut opportunum auspicatumque rei bene gerendae, & abstrusarum rerum pulchra sua industria aperiendarum omen sint atque insigne; utque hoc tam propitio sydere, tam bono hesterni coronationis facti diei augurio sacra jam inaugurataque Societas ad Conditoris Gloriosissimi immortalem laudem, in seram posteritatem, ipso una cum industriae suae amplissimo, quem ex ea speramus, uberrimoque fructu transeat, floreat, perennet!



Responsio
ADMODUM REVERENDI
DOMINI
DANIELIS
ERNESTI JA-
BLONSKI,
S. T. D. Sacrae Regiae Majestatis
Prussiae Concionatoris Aulici, Socie-
tatis Scientiarum Directoris
& p.t. Pro-Præsidis,
Pro Inauguratione
Societatis Scientiarum.

Per-Illustris & Excellentissime Baro,
Domine perquam Gratiose.

EX quo Serenissimus Borussorum Rex, Dominus noster Clementissimus, duos illos gloriosæ suæ vitæ Dies maximè memorabiles, illum quo *Natus*, illumque quo *Coronatus* est, ei etiam rei sacros esse voluit, ut *Natali SCIENTIARUM SOCIETATEM* constitueret, *Coronationis* vero die, eandem solenniter dedicaret; hoc ipso clarissimè ostendit quanto Favore non *SOCIETATEM* tantum, sed ipsas quoque *SCIENTIAS* profeceretur. Testatur enim Regia Sua Majestas *Doctrinam & Literas* esse, ex quibus tantum *Delectationis* quantum ex ipsa vita capiat; & prout *Splendorem Augustæ Domus, Regiique Imperii Limites* amplissimis *Incrementis* ampliaverit, ita non minus sibi cordi esse, ut *Sapientiæ Regnum, bonarumque Artium Pomoeria* prout proferantur.

Consilium verè *Regium*! quod ad *Catholica Orbis Commoda*, ad *Humani Generis Utilitatem* se diffundit. Quamvis enim *Eruditione & Artibus* mortale Genus quam maximè opus habeat, iisque *inveniendis & excolendis* inde a *prima sui origine* operam dederit, non tamen hoc in studio tantum profecit, ut omnes artes perfecit, universumque *Scientiarum Campum* fuerit emensum.

Istæ verò quas dixi *Scientia* non tam *Necessitates Vitæ* quam *Commoda* ejus respiciunt; neque id adeo largiuntur ut homo vivat, quàm ut *eleganter vivat*, & *dignitati suæ* convenienter.

Quæ ad vitam necessaria sunt, propemodum sunt in promptu, & a natura, benigna matre, homini æque ac animalibus monstrantur præbenturque. *Artibus & scientiis* hic opus non est.
Ob-

Obvia & oblata arripiuntur, quemadmodum ab homine per rationem, ita per internum quendam instinctum ab animalibus.

Sed quæ vitæ Commoditatibus Elegantiæque intervniunt, ratione investiganda arteque paranda sunt. Horum usum cum solus Homo polleat, illa quoque quæ his parantur vitæ Commoda, ipsi soli in peculium cedunt, ita quidem ut partem eorum aliquam ipsum quoque Corpus, primariam Animus sibi vendicet.

Etenim quod pro cavernis & speluncis inconditis nitidas domos habitamus; quod pro fordidis pecudum ferarumque pellicibus vestes ex lini & lanæ filis vel bombycum telis contextas, gestamus; quod pro dura glande, crudaque radice & inculto fructu suavis & ad palatum compositis cibus vescimur; hæc & his similia, ad Corporis cultum sensusque oblectandos pertinent. Longè autem major voluptas est quæ scientiarum ope Animum perficit & delectat. Is siquidem Naturam cognoscit, naturæque Dominum, miratur illius divitias & hujus potentiam veneratur, scrutatur invenitque hominis usui præclara Dei opera patere ut corpus iis sustentetur & excitetur anima, atque ab operibus ad auctorem penetret; Verboque DEI illuminata ac adjuta perveniat in Creatoris societatem ac gloriam, hic quidem gustandam, sed in coelo perfruendam.

Hunc igitur usum ingenuæ artes cum habeant, homo iis diu carere non debuit. Quare a Deo in ipsa Creatione earum femina accepit, per quæ deinde quasivit, quibus se ab animalibus ceteris distingueret, & vitam domino animantium dignam viveret.

Prima artium exordia ab arate antediluviana sunt arcifenda. Jam tum homines intelligentes, quid se deceret, Necessariis non contenti Commoditatibus vitæ & humanitati studuerunt. Lamechi filium Jabalem legimus pecudes pavisse, & habitasse casas, id in necessariis ponitur; sed fratrem Jubalem in Musicam incubuisse, ut homo laboribus fessus ejus suavitate reficeretur. Ex Zilla altera uxore idem Lamechus Tubalcainum sustulit, fer-

ramentorum Magistrum & auctorem fabricarum; ad colendum agrum & victum inde comparandum, necessarius hic erat labor: Huius autem soror Naama, quæ *formosam & jucundam* significat videtur duos fratris labores vitæ elegantiæ & venustate temperasse.

A Diluvio, ut ipsi Homines, sic humanæ Artes ex Oriente originem acceperunt.

Chaldaei & Ægyptii primi earundem Inventores habentur; verum enim verò istis curæ fuit Inventæ suæ in Templis abscondere, Ænigmatis Imaginum Hieroglyphicarum involuta; & quod in Dei Immortalis gloriam, Mortaliumque Commoda, super tectâ prædicandum fuerat, alter alterius in aurem mustabant. Neque vero celebrata illa Chaldæorum sapientia non ex merito viris doctis suspecta habetur, quandoquidem ipsi primariò quidem Astronomiæ operam locantes, atque quadringentorum & septuaginta millium annorum Observationes jactitantes, tam longi tamen temporis decursu haud deprehenderunt Lunam Corpus opacum esse, quod Lucem suam a Sole ipsam illustrante mutuari debeat.

Post hos *Græci* artium & scientiarum laude floruerunt; quarum tamen initia non ad *Homeri* demum, aut *Pythagoræ* atque *Platonis* ætatem referenda sunt. Pauca illa & obscura quæ in præfatis Monumentis supersunt *Orphei* Vestigia, testantur, ipsum suo, h. e. Bellum Trojanum facti diu antegresso tempore, homines in Cognitione Numinis & Divini Cultus erudiisse, Animorumque Immortalitatem & Artes quibus regerentur Respublicæ, nec non Virtutes & bonos mores docuisse. Prout verò is Sapientiam suam ab Ægyptiis hauserat, sic in ea propaganda eadem qua illi methodo utebatur. Genuina enim Dogmata sua non nisi paucis selectisque Auditoribus distinctè tradebat, reliquo Gregi eadem in illo Mysticorum Rituum Choragio, quod *Mysteriorum Bacchi, Cereris, Corybantum* appellatione venit, proposuisse facti habens.

Quod-

Quoddam Sapientiæ Monopolium homines isti instituisse videbantur, sed eo *Pythagoras* cum primis ipsos deturbavit, aditu ad Scientias universis quibus ea Sacra frequentare volupe esset patefacto; a cujus tempore Philosophorum in Græcia ingens messis surrexit, sed qui multas in Sectas scissi, ad multas maximamque partem inutiles & vanas Disceptationes dilabebantur. Fuere tamen inter eos, qui Augmento Virtutum & bonis Moribus operam darent, alii qui Reipublicæ constituendæ & regendæ artes prudenter excolerent, alii qui acuendæ Rationi humanæ & Naturæ rerum indagandæ incumberent; quorum illud cum primis Socratem, istud Platonem, hoc Aristotelem fecisse, notum est. Sed res quoque Anatomica & Medica grandia tunc Incrementa cepit, Mathesis verò eousque provecta fuit, & Græcia jure Magistra ejus & Gymnasium diceretur.

Ut tamen quod res est fateamur, nugacem potius & garulam quam solidam Sapienciam pars major constabat, & qui Philosophi appellabantur, plus in ostentando Ingenii acumine, quam in Interioribus Naturæ scrutandis operæ ponebant. Libros scribebant, Systemataque contexebant, antequam res de quibus scribere in animum induxerant sufficienter perspexissent; magisque ut acutè & ornate de rebus differerent, quam ut intimè eas pernoscerent, erant solliciti.

Ab his ad *Romanos* Scientiæ transferunt, a quibus tamen haud eò quo par erat favore fuerunt exceptæ. Martius iste populus, Arma quàm Libros tractare prior, satis sibi sapiens videbatur, dum Leges suas & Mores Patrios intelligeret, suosque homines severiore Disciplina & vitæ genere ad virtutem composito contineret. Modicum illud Scientiarum, quod sensim a Græcis ad ipsos dimanaverat, ita colebant, ut ejus vix alius esset usus, quàm ut Sermones suos eo ornarent, aut Solitudinis inde peterent Solatium.

Antequam Philosophia profundiores ibidem radices agere posset, Occidentaliorem Europam diversis diverso tempore Bar-

barorum Incurfionibus inundari contigit, qui Romam Orbis Dominio juxta atque Scientiis & Artibus spoliavere. Secuta est nox Infcitiæ & Barbarici tenebrosiffima, quæ nobiles istas Regiones per aliquot Secula opprefit, usque quo CAROLUS MAGNUS, Orientis ad instar Solis ejus dispellendæ initium faceret. Hic Imperator verè Magnus, quemadmodum ipse Linguis & Scientiis, pro illius temporis ratione solidè imbutus erat, ita iisdem propagandis incumbere totus; apertis eo fine publicis per Italiam, Galliam, & Germaniam Scholis; ipsaque frequenti numero & grandibus impensis fundata Coenobia nihil erant aliud quàm Eruditionis Seminaria.

Renatam hoc pacto Philosophiam diceres, sed in cunis adhuc vagiebat, aut ad serperastra saltem oberrabat, virile robur & decus minimè afsecuta; cum quæ tempora illa excepit SCHOLASTICORUM Doctorum Sapia, illius Incremento obicem poneret. Eruditio cui isthoc hominum genus se dederat, Aranearum telæ erat perfimilis, subtilis quidem sed nullius vel virtutis vel usus. Abstractis finè fine & modo Speculationibus indulgebant, ejus rei solitariâ quam ducebant vitâ occasionem eis præbente; cumque investigandis Naturæ Arcanis manus admovenda esset, ipsi satis habebant vivaci Phantasiæ fræna laxasse. Subtiles istos conceptus obscuris exprimebant vocabulis, Sapientesque sibi videbantur, si Lingvam sonarent a nemine intellectam, iisque qui eâ uterentur inslandis, quàm Veritatibus vel novis detegendis vel veteribus amplificandis aptiorem. Atque hoc pacto pro Junone Nubes, & Rerum loco Verba Orbi obtudebantur.

Tandem singulari Divinæ Providentiæ beneficio factum est, ut Græcia a Turcis pressa, secunda vice unâ cum Scientiis Linguam quoque suam nobis impertiret; quo tempore etiam Latina, quæ in ipso Latio pridem fuerat emortua, feliciter revixerat. Excepit hanc præclarum illud Typographiæ Inventum, cujus Beneficio tam pridem Demortuorum quàm etiamnum viventium

Co-

Cogitata citò & facile communicari possunt. Ejus ope unà cum Scriptis Veterum Sapiencia quoque ipsorum e pulvere & tenebris eruta, Lucique restituta fuit; Sed eo ipso clarius patuit, quanto etiamnum defectu Humana Cognitio laboraret, eosque qui Philosophiæ laude hæcenus inclaruerant, in Atrio potius Sapienciæ substituisse, quàm in interiora ejus Sacraia penetrasse. Incomparabilis ille Angliæ Cancellarius, *Baro de Verulamio* præ aliis profundius ista introspectit, Scientiarumque Amatoribus Dux & auctor existit, ut Naturam Rerum curiosiore magisque serio quàm hæcenus factum fuerat studio scrutarentur. Eum facem præferentem certatim alii secuti sunt.

Ab eo tempore ingens Eruditorum Virorum proventus fuit, qui in investiganda Natura, trinâ illa Clave Adyta ejus aperire apta feliciter usi sunt, nempe *Mathesti*, quæ Coelos Terramque dimittitur, & *Anatomia* atque *Chymia*, quarum ope tria Naturæ Regna, Animale, Vegetabile & Minerale recluduntur.

Præclaris horum conatibus obstetricatura Divina Bonitas, Seculum proximè præterlapsum variis iisque utilissimis beavit. Inventis: *Microscopiorum*, quæ Objecta minuta immensum augment; *Telescopiorum*, quæ procul absentia velut præsentia sistunt; *Horologiorum Pendulorum*, quæ Temporis lapsum, syderumque cursus accuratissimè metiuntur; & *Antlia Pneumatica*, quæ e Vasis conclusis aërem crassum extrahit. Horum & similibus Inventorum ope, maximè Itineribus ad remotissima Loca, mari terraque accedentibus, limites cognitionis humanæ immensum prolati sunt, tamque admirandis Repertis aucti, ut quamvis qui hac tempestate florent a Veteribus multa didicerunt, veteres tamen si resurgerent a modernis haud pauciora discenda essent habituri.

Isthæc verò Scientiarum Incrementa Societates quàm singuli Homines rectius promovere aptæ natæ sunt; indeque factum est, ut sapientes illæ & curiosæ Britannorum Gallorumque Gentes, easdem eximio cum profectu instituerint. Eorum enim

quæ ad Naturam rectè indagandam pertinent, nonnulla possidere datum est omnibus, omnibus gaudere nemini. Alius Ingenio & speculationis acumine pollet, Judicii maturitate alius, alium multijuga Lectio, alium frequens Literarum commercium, alios alia commendant. Istitis in Societatem coalescentibus, alter alterius defectum supplet.

Præterea, homines ita comparatos esse scimus, ut plerumq; alius quidem justo plus, alius verò justo minus ipse sibi tribuat. Neutrum sibi relinquendum esse reor, sed alterum alteri sociandum, quo uterque sensim rectius de se sentire discat. Imo verò (quod Vir quidam in Republica Literaria nostra ætate perquam celebris fecit) optandum foret, non Personas solum sed ipsas Nationes in Societatem coire, ut (si quidem id fieri possit) in unum jungantur Gallorum Vivacitas in quærendo, Subtilitas Anglorum in perscrutando, Hispanorum Italarumque contentio in progrediendo, Germanorum studium & sedulitas in perficiendo. Profectò ibi felicissimè procedit opus, ubi Oculorum, Manuum, atque Ratiociniorum datur Conjunctio.

In Germania nostra præterito Seculo tres surrexerunt Societates Eruditæ, nominibus *Cygni Ordinis*, *Societatis Carpophoræ* (seu *Fructiferae*), & *Collegii Naturæ Curiosorum* celebres. Prioræ duæ Linguae patriæ Puritatem, tertia Naturæ cognitionem promovendam sibi sumserant. Primæ illi Vir eruditus, sed privatus; alteri Princeps Imperii; tertiæ Gloriosissimus Imperator natales dedit. Id erat reliquum, ut ineunte Novo Seculo, Rex Augustus Quartam fundaret, quæ Linguas juxta atque Scientias, adeoque discreta illarum Objecta, una complecteretur.

Atque hoc ipsum est, quod jam oculis nostris usurpamus, quodque felix & faustum esse jubeat DEUS; cum auspiciis & nomine Augusti Borussorum Regis, Domini & Fundatoris nostri Indulgentissimi, Tu, Excellentissime Domine, Regiam hanc Scientiarum Societatem solenniter dedicasti, eique Pensa sua imperast.

Re-

Regia isthac Munificentia Rex Serenissimus universum Genus Humanum sibi devinxit, cujus catholico & universali Bono eam destinavit. Sigillatim verò humillimas Majestati Suae gratias debet recens nata hæc Societas, ut in quam isti Regiæ Clementiæ atque Liberalitatis rivuli immediatè defluunt. Clementissimus Rex Vitam Ei & Vigorem largitus est, Legibus & Institutis salutaribus munivit, de commoda Sede deque Reditibus necessariis prospexit, denique de Regia sua Gratia & Protectione in posterum quoque jusfit esse certam. Magna hæc & præclara esse Regiæ in nos Beneficiæ Munera grato animo agnoscimus, iisque beatos nos prædicamus, quamvis destinatus Societatis Ærario Proventus mediocritatis cancellos nondum sit egressus. Qua quidem in re habemus a cæteris Societatibus dissimilitudinem. Cum enim qui *Britannica* adscripti sunt, ad tolerandas Societatis Impensas propria conferant; contra, qui *Gallica*, magnificis Regis Stipendiis alantur; hic neutrum usu venit. Nulli hinc nobis Reditus obveniunt; at neque Sumptibus faciendis oneramus; sed Regia Munificentia tantum possidemus, quantum & Diligentioribus excitandis, & Bene meritis remunerandis, & Instrumentis mathematicis, Librisque, nec non reliquis rebus necessariis comparandis sufficiat. Voluntariæ ergo & gratuitæ operæ Milites sumus; alibi quidem Sparta quam nacti sumus orandæ obligati, hic verò spontanea Promptitudine Musas demerituri. Prout verò in Campo Martio fieri assolet, ut Voluntarii Milites operam sæpe navent & utilem, & gloriosam, ita in isthac Scientiarum Palæstra similem nos laudem reportaturos esse confido.

Nonne verò animadvertis, Excellentissime Domine, ut eximiam Læticiam ipso vultu oculisque præferat inçlyta isthæc Societas? ut frontem universi exporrigant? ut toti in plausus solvantur? Nempe, quia Tu, Perillustris Domine, Præses & Præsidium ipsis datus es. Quem equidem delectum Rex Sapien-
tissimus sua sponte egit, sed quem, si optio nobis relicta fuisset,
Nos,

Nos omnibus votis atque precibus eramus expetituri. Gaudium ergo, quo perufos vides, iustum est. Quamvis enim eorum qui Panegyrim hanc ornant paucissimis exploratum esse queat, quanto ardore inde a tenera ætate Literis incubueris; & postquam ad Aulam accesseras, quod Scientias pari ardore ac Principem colueris, quod Sapientiæ fervidius quam Fortunarum Incremento operam dederis, quodque cum ipsius somni & necessariæ quietis dispendio studiis tractandis incubueris; hoc tamen omnes sciunt, TE, & solidæ Eruditionis laude florere, & Eruditorum Decus atque Præsidium usque fuisse. Felici ergo faustoque òmine novella hæc surgit Societas, ut quam Regum, qui modo imperant, Doctissimus fundavit, Ministroque Status Doctrina pariter eminenti curandam tuendamque demandavit. Quid non inde speremus omnes! quæ non & Societati & Scientiis emolumenta polliceamur! Id unum superest, Perillustris & Excellentissime Domine, ut Tuo nos Favori obnixè commendemus, Teque oremus, ut Regiam pariter Gratiam constantem atque illibatam nobis conservare digneris.



Icon

Icon
&
Explicatio
NUMMI,

In memoriam fundatæ Societatis
Scientiarum cusi,

Icon



et

Explicatio

NUMMI

In memoriam fundatae Societatis
Scientiarum cult.





Natali quæ nata Tuo, Tua sidera in omen

Accipit, & magnæ Symbola mentis avem;

Grata pios celebrans tam faustæ lucis honores,

Nostra Cohors, Dominum vix satis orta colit. Re-

*Regia Te virtus FRIDERICE attollit
Olympo,*

*Nos voce atq; oculis fas sit in astra sequi;
Et spectare Aquilam Brennos quæ lu-
mine signat,*

*Quosq; parat cœlum & dat Tibi terra
gradus.*

*A Rheno ad Memelam tua magna est
portio nostri*

*Orbis, & Arctœ Te venerantur aquæ.
Esto diu felix princeps, conjuxq; paterq;
Sera Tuos rapiant sidera, Teq; Tuis.*

*In Figura Emblematis Nummo inscripti pro Tesserâ Societatis pla-
uit Aquila Brandenburgica, quæ volatum dirigit ad Sidus proprium,
stellis designatum, quibus Aquilæ Asterismum agnoscas. Epigraphe
est: COGNATA AD SIDERA TENDIT, quæ non minus huic fi-
guræ & velut Corpori Tesseræ, quam Animæ ipsius, id est sententiæ re-
sponder: nam simul innuit mentem hominis cœlo ortam, originem
suam repetentem; & magni Principis animum, ad excelsa & cœlestia
se attollentem; & Societatis ab ipso fundatæ institutum, non tam ad
spectabile cœlum, quam ad cœli Dominum, & lucem mentium super-
nam, & Divinæ gloriæ incrementa per scientias, viam affectantis.
Aquilam verò, regiam avem, Jovis armigeram, simul à viribus & per-
spicacia laudari, potentiamque cum sapientia indicare; & in hiero-
glyphicis & nummis veterum, divinitatis, & consecrationis, & im-
mortalitatis animæ Symbolum haberi constat,*

CATA-

CATALOGUS
MEMBRORUM
SOCIETATIS
SCIENTIARUM,

A Serenissimo & Potentissimo
Rege Prussiæ fundatæ Berolini,
Anno 1700.

Inde ab initio foundationis ad annum 1712.

*[Quibus appositum signum † est, eos in vivis
esse desisse notat.]*

FRIDERIK II. *Imperator*
CATALOGUS
MEMBRORUM
SOCIETATIS
SCIENTIARUM

A Serenissimo & Potentissimo
Rege Prussiarum Frederico
Anno 1760.

Ludo ab anno fundationis ab anno 1722.

[Faint text, likely bleed-through from the reverse side]

A
C
F
H
J
L
J
L
C
Ja
Jo





Præses.

Geo. Wilh. de Leibnitz, Consiliarius intimus Regius
Boruss. & Electoralis Brunsvico-Luneb.
Sociorum nomina secundum ordinem Alphabeti di-
sposta sequuntur.

Carolus Conradus Achenbach, Consiliarius Ecclesiasticus & Con-
cionator Aulicus Regius Berolini.

And. Acoluthus, Pastor Ecclesie & Lingu. Orient. P.P. Vratislav. †

Car. Ancillon, Consiliarius Legationum Regius & iudex superior
Gallorum Berolini.

Pet. Dancicour, Secretarius Regius Berolini.

Henr. Basnage de Beauval, Jctus Hagæ Com. †

Jacobus Banagius, Pastor Ecclesie Gall. olim Roterod. nunc
Hagæ-Comit.

Jo. Frid. Beckmannus, S. Theol. D. Prof. P. & Facult. Senior
Francof.

Jo. Henr. Beer, Architecturæ Præfectus Regius Berolin.

Laur. Begerus, Consil. Antiquarius & Bibliothecarius Regius
Berolin. †

Christ. Barth. Behrens, Medic. D. Hildesf.

Jac. Bernoulli, Prof. Mathes. Basil. †

Jo. Bernoulli, Prof. Mathes. olim Groning. nunc Basil.

Dav.

Dav. Blasius, Prof. Mathel. Regiom̄i.
Joh. Chamberlaine, Societatis de propaganda fide Britannicæ
 Secretarius, Regiæ Societatis Anglicanæ Socius.
Steph. Chauvin, Pastor Eccles. & Rector Gymnasii Gallic. Berolin.
Jo. Chodowiecki, Rector Gymnasii Petri Gedan.
Jo. Jac. Chuno, Consiliarius & Archivarius Regius Berolin.
Jo. Colas, Anglus, Philos. & Med. D. Regiomonti.
Jo. Frid. Cramer, Consiliarius Regius Regiminis Duc. Magdeburg.
Maur. Veyziere la Croze, Bibliothecarius Regius Berolin.
Ern. Sal. Cyprianus, Athenæi Casimiriani Coburg. Director.
Joh. Georg. Eckhardus, Prof. Histor. Helmstad.
Jo. Fabricius, S. Theol. D. Abbas Regioluterensis, Consil. Eccles.
 Brunsvicens. & Theol. Prof. Primarius Helmstad.
Mich. Fardella, Abbas, Philosophiæ P. P. Patavin.
And. Fountain, Eques Aur. Anglus.
Aug. Herm. Francke, S. Theol. D. & Prof. P. Halens.
Jo. Leon. Frisch, Con-Rector Gymnasii Urbani Berolin.
Joh. Dan. Goblus, M. D. Berolin.
Georg. Gothofredus, Jctus Lipsiens.
Jo. Gottsched, Med. D. & Prof. P. Regiomont. †
Christ. Alb. de Greiffencrantz, Consiliarius Reg. Svec. & Can-
 cellarius Regim. Bipont.
Gab. Groddeck, Gymnasii Gedan. ad S. S. Trinit. Prof. & Biblio-
 thecarius. †
Sam. Grosserus, Rector Gymnasii Görlicensis.
Mart. Grünberg, Architectus Regius Berolin. †
Domin. Guilielminus, Med. D. & P. P. Patav. †
Phil. Jac. Hartmannus, Med. D. & P. P. Regiomont. †
Nic. Hartsöcker, Consiliarius Elect. Palat.
Jo. Mich. Heineccius, Consiliarius Consistorii, Inspector Eccles.
 Urb. & Diæcesis Salanæ, Pastor Primarius ad D. Mariæ, &
 Scholarcha Halens.
Georg. And. Helwing, Pastor Angerburg.

Chr.

Chr. Henfling, Consiliarius Aulicus Brandeburgo-Anspac̄
Petrus Ludovicus Henrich, S. T. D. Concionator Aulicus Regius
 & Bibliothecarius Berolin.
Jac. Hermannus, Mathes. P. P. Patavin.
Frid. Hofmannus, Consiliarius Regius Med. D. & P. P. Halens.
Joh. Henr. Hofmannus, Astronomus Regius Societatis Scientiarum
 Berol.
Gabriel Holst, J. U. D. Gedanensis.
Henricus L. B. ab Huyssen, Russorum Cæsari a Consiliis intimis
 bellicis & iustitiæ &c.
Dan. Ernst. Jablonski, S. Theol. D. Concionator Regius Berol.
Joh. Theod. Jablonski, Secretarius Societ. Reg. Berolin.
Frider. Jagwitz, Consiliarius & Medicus Aul. Reg. Berol.
Nic. Ibring, Ecclesiastes Cassellis.
Christ. Junkerus, Historiographus Saxon. Gymnasii Illustr. Ille-
 nac. Rector & Bibliothecarius.
Gothoff. Kirch, Astronomus Societatis Regius Berol. †
Joh. Christoph. Klimm, Med. D. Halens.
Matth. Kramer, Linguarum Professor Noriberg.
Theod. Christ. Krug de Nida, Consiliarius intim. Aul. & Mineral.
 & Protoarchiater Regius Berolin.
Car. Nic. Langius, Med. D. Lucernens.
Joh. Georg. Leukfeldius, Pastor Primarius Gröninganus Ser. Dia-
 cis Brunsvico-Luneb. Consiliarius rerum Eccles.
Ferd. Helff. Lichtscheid, Consiliarius Eccles. & Præpositus Colo-
 niæ ad Spream. †
Mich. Lilienthal, A. M. Regiomont.
Paul Jac. Marperger, Consiliarius Aulicus Duc. Olsnens.
Gerh. Meierus, S. Theol. D. & Pastor Eccl. Reform. Bremens. †
Car. Wilh. à Meisenbug, Consiliarius Regim. Marburg. Hass.
Conr. Mell, Præpositus Hirschfeldens.
Anast. Michaelis, Nobilis Macedo.
Claudius Grotteste de la Mothe, Pastor Ecclesiæ Gallicæ Londin.
 Phil.

- Phil. *Müllerus*, Præpositus B. Mariæ Virg. Magdeb. S. Th. D. & Prof. P. Jenens.
- Wyerus *Gvilielmus Muys*, Med. D. & Mathem. P. P. Franeker.
- Phil. *Naudé*, Prof. Mathes. Academiæ illustris Regiæ & Gymnasii Joachimici Berolin.
- Phil. *Naudé*, Jun. Prof. Mathes. Adjunct. Gymn. Joach. Berol.
- Benj. *Neukirch*, in Academia illustri Regia quæ Berolini est elegantiorum Literarum P. P.
- Casp. *Neumannus*, Pastor ad D. Elisab. Inspector Ecclesiarum & Scholarum Vratislav.
- Chr. Henr. *Oelven*, Magister Equitum Berolin. †
- Chr. *Rabnerus*, Consiliarius Regius Regim. Pomer. †
- Bernh. *Ramazzinus*, Medic. D. & P. P. Patavin.
- Joh. *Rauc*, Archi-Diaconus ad D. Nicolai Berol.
- Sam. *Reyherus*, J. U. D. ejusdemque & Mathes. P. P. Kilon.
- Georg. Fried. *Retzel*, Med. D. Brunsvic.
- Ol. *Ræmerus*, Consiliarius Regius Justitiæ & Cancellariæ, in Collegio Consistoriali Assessor & in Academia Hafniensi Mathes. Professor Regius. †
- Jo. Ern. *Schaper*, Med. D. & P. P. Rostoch. Archiater Duc. Meckl.
- Joh. Jac. *Scheuchzerus*, Med. D. Tigur.
- Joh. Henr. *Schlüter*, Consiliarius Aulic. Reg. Consul Berolin. & Syndicus Prov. Marchiæ Elect.
- Jo. And. *Schmid*, S. Th. D. Abbas Marienthal. Theol. Prof. & Facult. Senior Helmstad.
- Jo. Car. *Schott*, Consiliarius, Antiquarius & Bibliothecarius Regius Berolin.
- Jo. Ern. *Segers*, Alumnorum Regionum & Convictorii Inspector Regiomont.
- And. Ern. *de Seidel*, Consiliarius Regius Francosurt. †
- Christ. Maxim. *Spenerus*, Med. D. Consiliarius Regius Berol.
- Nathanael *de Staps*, Colonellus, Consiliarius Collegii Heraldici, Præfatus Illustris Academiæ Regiæ Berolin.

Sch.

- Seb. Gothof. *Starcke*, Academiæ illustris Brandeb. Director. †
 Jeremias *Stercky*, Phil. & Theol. D. Professor Francofurt. honorarius, Pastor Prim. Ecclesiæ Parochialis Reform. Berol.
 Jo. Frid. *Sturmius*, Concionator Regius Berolin. †
 Leon. Christ. *Sturmius*, nuper Mathes. P. P. Francof. ad Oderam, nunc Architectus Primarius & Provincialis Duc. Meckelburg.
 Mich. Frid. *Tbormann*, Med. D. Consiliarius Regius Berolin. †
 Alph. *Turretinus*, S. Th. D. ejusdemque & Histor. Eccles. P. P. nec non Pastor Ecclesiæ Genev.
 Mich. Bernh. *Valentini*, Med. D. & Prof. P. Giessens. Archiater Hasniæ.
 D. Abbas *Varignon*, Regiæ Academiæ Scient. Paris. Academ.
 Alph. *Des-Vignolles*, Ecclesiastes Gall. Berolin.
 Paulus *Volckmannus*, S. T. D. Rector Gymnasii Elect. Joachimici & Bibliothecarius Reg. Berolini.
 Christ. *Waltberus*, S. Th. D. Pastor Sackheimens. Regiomont.
 Georg. Wolfg. *Wedelius*, Med. D. & P. P. Jenens. Consiliarius & Archiater Saxon.
 Gothofr. *Wegnerus*, S. Th. D. & Prof. P. Regiomont. †
 Sam. *Werenfelsius*, S. Th. D. & Professor Basileens.
 Jos. *Wernerus*, Director Academiæ Regiæ artium Sculptoriæ & Pictoriæ Berolin. †
 Jo. Erdm. *Witte*, Consiliarius Regius Halens.
 Christianus *Wolfius*, Mathem. P. P. Halens.
 Joh. Christoph. *Wolfius*, Prof. Lingvarum Orientalium Hamburg.
 Jo. Phil. *de Wurtzelbau*, Noriberg.
 Theod. *Zwingerus*, Med. D. & Prof. P. Basileens.



Pa
871

BREVIS ENARRATIO,

Condita

A Serenissimo Potentissimoque
Rege Borussiae

FRIDERICO I.


In Regia sua Berolinensi

SCIETATIS SCIENTIARUM

; ea tandem constituta sit & inaugurata.

antur Diploma foundationis, Leges institutionis, Oratio-
nes sub inaugurationem habitae & Catalogus membrorum
Societatis.

Observatorium Societatis Regium.



BEROLINI,

ensis Joh. Christ. Papeii, Bibliopola Regii Societatisque
Scientiarum Regiae privilegiati.

thardi Schlechtigeri, Regii pariterque ejusdem Societatis Typographi.
M. D. CC. XII.

Blue
Cyan
Green
Yellow
Red
Magenta
White
3/Color
Black

Farbkarte #13

B.I.G.

Centimetres
1
2
3
4
5
6
7
8
9
10
11
12
13
14
15
16
17
18
19
Inches
1
2
3
4
5
6
7
8

9.

Pa 871